



**TEKS UCAPAN**  
**YAB DATUK SERI UTAMA HAJI SULAIMAN BIN MD ALI**  
**KETUA MENTERI MELAKA**  
**SEMPENA**  
**MAJLIS PENYAMPAIAN SUMBANGAN**  
**BANTUAN RAMADAN PERINGKAT DUN LENDU**  
**19 APRIL 2021 (ISNIN), JAM 5.00 PETANG**  
**DEWAN TAMING SARI, UiTM LENDU**

---

بِسْمِ اللَّهِ الرَّحْمَنِ الرَّحِيمِ

**Assalamualaikum warramatullahi wabarakatuh,  
Salam Sejahtera dan Salam Melakaku Maju Jaya, Rakyat  
Bahagia, Menggamit Dunia.**

Terima kasih Pengacara Majlis;

Yang Berhormat EXCO Kerajaan Negeri Melaka;

Yang Berusaha Tuan Rahizi bin Ranom,  
Pegawai Daerah Alor Gajah;

Ketua-ketua Jabatan Peringkat Daerah Alor Gajah;

Pimpinan Masyarakat, Rakan-rakan Media;

Yang Berbahagia Datuk-datuk, Datin-datin;

Tuan-tuan dan Puan-puan;

Muslimin dan Muslimat yang dirahmati Allah S.W.T.

## **MUKADIMAH**

1. Alhamdulillah, sempena hari ke-7 Ramadan bagi tahun 1442 Hijriyah ini, marilah kita bersama-sama mengucapkan setinggi-tinggi kesyukuran ke hadrat Allah SWT kerana dengan limpah kurnia dan inayah-Nya, kita diberi nikmat kesihatan yang baik, sekali gus berkesempatan untuk hadir ke Majlis Penyampaian Sumbangan Bantuan Ramadan Peringkat DUN Lendu bagi tahun ini.

2. Terlebih dahulu, bagi pihak Kerajaan Negeri Melaka, saya merakamkan ucapan terima kasih dan syabas kepada pihak penganjur kerana dapat menjayakan majlis yang penuh bermakna ini dengan begitu baik. Semoga usaha yang komited ini diberkati oleh Allah SWT.

Saudara dan saudari yang saya kasihi sekalian,

## **BULAN RAMADAN**

3. Kedatangan Ramadan iaitu bulan seribu rahmat amat ditunggu-tunggu oleh seluruh umat Islam. Di bulan yang mulia ini, Allah SWT telah menjanjikan pelbagai kelebihan. Ia juga seperti sabda Rasullulah SAW yang diriwayatkan oleh Bukhari dan Muslim yang bermaksud,

***“Apabila tiba Ramadan, telah dibuka pintu-pintu syurga, dan telah ditutup pintu-pintu neraka yang dibelenggu syaitan-syaitan.”***

4. Justeru, sempena kedatangan Ramadan, inilah masa yang terbaik untuk kita membuat pelbagai amal kebaikan serta melipatgandakan amal ibadat kepada-Nya. Sesungguhnya, ibadah puasa adalah satu ibadah yang istimewa. Ia adalah ibadat yang kita lakukan tanpa sesiapaupun mengetahui kita sebenarnya sedang beribadat kepada Allah SWT. Tidak seperti ibadat lain yang boleh dilihat dengan nyata dari segi perbuatan, tetapi ibadat puasa tidak boleh dilihat. Kita sekadar menahan diri daripada rasa lapar dan dahaga serta tidak melakukan perkara-perkara yang boleh membatalkan puasa.

5. Marilah kita bersama-sama merebut peluang dengan kedatangan bulan Ramadan yang penuh berkah ini untuk meringankan tangan dengan memberi sumbangan dan memperbanyakkan amal jariah. Di hujung Ramadan, moga-moga kita semua bebas daripada dosa dan meraikan kemenangan.

Saudara dan saudari yang dihormati,



## **PEMATUHAN TERHADAP SOP BAZAR RAMADAN**

6. Ramadan kali ini, bagi saya ia lebih istimewa buat kita semua berbanding tahun sebelumnya. Pada tahun ini, pihak Kerajaan Negeri sangat prihatin kerana telah membenarkan pengoperasian bazar Ramadan, penyediaan bufet Ramadan di hotel-hotel serta kedai-kedai makanan selain kebenaran menunaikan solat Terawih di masjid-masjid dan surau di negeri ini. Di samping itu, para peniaga juga boleh meraih hasil pendapatan, lebih-lebih lagi dalam keadaan pandemik COVID-19 yang masih belum menemui noktahnya .

7. Di kesempatan ini, suka saya mengingatkan kepada semua bahawa kebenaran yang diberi ini adalah bersyarat iaitu menjadi tanggungjawab ke atas diri tuantuan dan puan-puan untuk memastikan Prosedur Operasi Standard (SOP) yang telah ditetapkan oleh pihak Kerajaan dipatuhi pada setiap masa. Amalan penjarakan fizikal 1 meter, pemakaian pelitup muka dengan betul, penggunaan *hand sanitizer* dan pendaftaran melalui aplikasi MySejahtera hendaklah menjadi amalan norma baharu. Sekiranya perkara asas ini tidak kita amalkan dalam kehidupan seharian, saya amat bimbang, penularan wabak COVID-19 akan semakin meningkat semula di Negeri Melaka.

Saudara dan saudari yang dikasihi sekalian,

## **PENDAFTARAN VAKSIN COVID-19**

8. Sepertimana kita sedia maklum, suntikan vaksin fasa kedua bermula pada hari ini (19 April 2021). Fasa ini memfokuskan pemberian vaksin kepada warga emas, Orang Kurang Upaya (OKU) dan golongan berpenyakit kronik. Bagi Daerah Alor Gajah, Pusat Pemberian Vaksin adalah bertempat di Kompleks Sukan Masjid Tanah.

9. Justeru, saya menyeru kepada seluruh rakyat Negeri Melaka khususnya penduduk di Daerah Alor Gajah untuk mendaftar vaksin dengan segera bagi pembentukan imuniti kelompok di negeri ini. Saya juga menyeru pegawai dan kakitangan agensi Kerajaan memainkan peranan dengan membuat hebahan dalam kalangan ahli keluarga terdekat, saudara mara dan jiran tetangga untuk mendaftar vaksin. Pendaftaran vaksinasi ini boleh dibuat secara dalam talian, menerusi aplikasi MySejahtera atau melalui laman sesawang khas di [www.vaksincovid.gov.my](http://www.vaksincovid.gov.my).

Saudara dan saudari,

## **PENUTUP**

10. Akhir kata, saya sekali lagi merakamkan ucapan terima kasih dan setinggi-tinggi penghargaan kepada Pegawai Daerah Alor Gajah, pegawai dan kakitangan Pejabat Daerah dan Tanah Alor Gajah, pihak pengurusan UiTM, Penghulu-penghulu kawasan serta pihak JAPERUN Lendu di atas penganjuran majlis pada hari ini.

11. Terima kasih juga kepada semua barisan EXCO, Ahli-ahli Dewan Undangan Negeri, Ketua-ketua Jabatan serta semua penerima sumbangan yang hadir pada petang ini. Sesungguhnya kehadiran semua pihak pada petang ini telah menyerikan lagi majlis yang penuh bermakna ini.

12. Kepada semua penerima sumbangan yang diraikan pada petang ini, semoga dengan kehadiran dan interaksi seumpama ini sedikit sebanyak hasrat kerajaan dalam menyampaikan amanah kepada rakyat telah dilaksanakan selain pembangunan agama Islam dapat dikongsi secara terus dan tulus di semua peringkat masyarakat.
  
13. Semoga bulan Ramadan yang penuh kemuliaan ini memberi rahmat dan keberkatan kepada rakyat dan Negeri Melaka serta bulan Syawal yang mendatang akan membawakan cahaya kecemerlangan dan kejayaan yang berterusan juga. Insya-Allah.

Sekian.

وَبِاللّٰهِ التَّوْفِيقِ وَالْهُدَايَةِ وَالسَّلَامَ عَلَيْكُمْ وَرَحْمَةَ اللّٰهِ وَبَرَكَاتُهُ

-TAMAT-